

DOMINGU IV KUAREZMA – TINAN C

Tema

Liturjia ohini nian konvida ita ba deskoberta Maromak nia domin nian, hodi haka'as an atu hala'o moris ida komuñau nian ho Nia.

Evanjellu aprezena mai ita Aman Maromak ne'ebé hadomi ho forma gratuita, ho domin fiél no rohan laek, maski oan rebelde halo hilin laloos no laho' responsabilidade. No domin ida-ne'e nafatin hein, laho' kondisaun, atu simu no hakohak oan ne'ebé deside atu filafali. Ne'e mak domin ida laran-sadia nian no la'ós tuir justisa ema nian.

Leitura daruak konvida ita atu simu oferta domin nian ne'ebé Maromak halo mai ita liuhusi Jezús. Ho de'it rekonsiliaun ho Maromak no ho maun-alin sira ita bele sai kriatura foun.

Leitura dahuluk, konvida ita ba konversaun, nu'udar prinsípiu ba vida foun iha rai ksolok nian, liberdade nian no dame nian. Ema foun mak don ida Maromak nian ne'ebé hadomi ita no konvoka ita ba ksolok.

LEITURA I – Jos 5,9a.10-12

Livru Josué nian haktuir entrada no instalasaun Maromak nia Povu nian iha Rai Prometida. Hodi uza jéneru literáriu épiku (konta ho modu ezajeradu, hatudu kmanek boboot) no aprezena ho modu ideál posesu Rai nian nu'udar Povu nia paseiu triunfál ho Maromak iha oin, autór deuteronomista sira subliña Jahwéh nia kbiit hodi kumpre promesa ba amtuak sira. Ne'e la'ós livru ida presizu liu husi pontudevista istóriku; maibé katekeze furak kona-ba Maromak nia domin ba nia Povu.

Testu liturjia ohin nian, hatudu israelita sira foin hakat liu mota Jordaun. Sira hela iha Guilgal, fatin ida ne'ebé ohin loron seidak lokaliza (karik iha nordeste Jericó nian). Selebrasaun Páskua dahuluk iha Rai Prometida besik daudaun ona no sira ne'ebé simu sirkunsizaun de'it mak bele celebra (kf. Ex 12,44.48); nune'e, Josué halo Povu liu husi ritu sirkunsizaun nian, sinál aliansa Maromak nian ho Abraun no, nune'e sinál hola parte ba Povu eleitu Jahwéh nian (kf. Gn 17,10-11). Iha kontestu ida-ne'e mak mosu liafuan sira Maromak nian ba Josué haktuir iha leitura dahuluk.

MENSAJEN

Ritu sirkunsizaun nian, ba sira hotu ne'ebé moris iha rai-fuik, durante viajen, liutiha ézodu (kf. Jos 5,5), hotu ona no hotu-hotu agora halo parte ba Maromak nia Povu. Povu ida ne'ebé hafoun an, no ho forma ida-ne'e afirma filafali sira-nia ligasaun ho Maromak aliansa nian. Ritu ne'ebé Josué lori to'o rohan, halo ita hanoin kona-ba tipu ida "konversaun" koletiva nian, ne'ebé tau pontu finál ba "terus iha Ejitu" no marka "tempu foun" ba Maromka nia Povu.

Kestaun sentráal testu ne'e nian mak vida foun ne'ebé hahú ba Maromak nia Povu. Selebra Páskua iha rai livre, marka inísiu etapa foun ne'e. Israel agora sai Povu foun, Povu eleitu, ho kompromisu ho Jahwéh, livre ho modu definitivu husi moris atan ka eskravidaun, no hahú moris foun iha Rai foun Maromak nian iha ne'ebé "suli susu-been no bani-been".

LEITURA II – 2 Cor 5,17-21

Maizumenus iha tinan 56/57, to'o iha Korintu misionáriu itinerante sira ne'ebé apresenta an nu'udar apóstolu no kritika Paulo, hodi hamosu konfuzaun. Provavelmente sira mak "judaizante sira" ne'ebé hakarak impoin prátika Lei Moisés nian ba ba pagaun sira ne'ebé konverte an (bele mós sarani sira ne'ebé kondena Paulo ninia dixiplina forte no apoia moris sabraut iha laxizmu). Bainhira Paulo simu informasaun katak sira sadik ninia ministériu nia validade, nia dirije lalais kedas ba Korintu, pruntu atu enfrenta problema. Konfrontu sai violentu no Paulo hetan kanek todan husi membru ida comunidade nian (kf. 2 Cor 2,5-11;7,11). Tuir mai, Paulo husik Korintu no bá iha Éfeso. Liu tiha tempu ruma, Paulo haruka Tito bá Korintu, atu tenta rekonsiliaun. Bainhira Tito fila, nia lori notísia di'ak: konsege manán tiha diferensa no sarani sira Korintu nian hamutuk fali iha komuñau ho Paulo. Iha altura ne'e mak Paulo, ho fuan kmaan no iha dame, hakerek Surat ne'e ba Korintu sira, hodi halo apolojia kona-ba ninia apostoladu.

Testu ohin nian inklui iha parte dahuluk surat nian (2 Cor 1,3-7,16), iha-ne'ebé Paulo analiza ninia relasaun ho sarani sira Korintu nian. Iha testu ne'e ita haree nesesidade urgente rekonsiliaun iha Paulo nia fuan.

MENSAJEN

Liafuan xave leitura ne'e nian mak "rekonsiliaun". Iha surat ne'e ita bele haree Paulo nia laran-susar ba "distansiamentu" husi ninia oan doben sira Korintu nian no ninia vontade atu halo fali komuñau ho sira (iha surat ne'e tomak nia laran bele haree nia ko'alia kona-ba rekonsilia/rekonsiliaun dala sanulu).

Maibé, liufali rekonsiliaun entre sarani Korintu nian ho Paulo, nesesáriu rekonsiliaun entre sarani Korintu nian ho Maromak. Husi ne'e mak apóstolu nia ezortasaun atu sira husik rekonsilia sira-nia an ho Maromak. "Iha Kristu", Maromak ofere se ba ema sira rekonsiliaun; adere ba Kristu nia proposta katak simu oferta rekonsiliaun ne'ebé Maromak halo. Nune'e sai sarani implika, rekonsilia an ho Maromak (katak, aseita moris ho Nia iha relasaun auténtika komuñau nian, intimidade nian, domin nian) no ho ema seluk. Ida-ne' signifika, iha prátika, sai kriatura foun, ema foun ida.

Ba rekonsiliaun ida-ne'e mak Paulo sai "embaixadór" no manu-ain ; Paulo nia ministériu halo mós hodi husu sarani sira Korintu nian atu rekonsilia an ho Maromak hodi bele hetan moris foun, moris Maromak nian. Bolun ida ne'e serve mós ba sarani tempu hotu nian; ema sira iha nesesidade atu moris iha dame ba malu; maibé susar atu konsege ida-ne'e se sira la moris iha dame ho Maormak.

Testu taka (vers. 21) ho referénsia ba Kristu nia mate ne'ebé lori rekonsiliaun: liuhusi krús, Maromak fokit sai ita husi salan nia ukun no nakfilak ita iha ema foun. Katak sá? Hodi mate iha krús tanba Lei, Kristu hatudu oinsá Lei bele hamosu de'it mate, deskualifika Lei, hodi halo ita bele iha enkontru loos ho Maormak; liuhusi krús, Jezús hanorin mai ita domin totál, domin ne'ebé saran an, hodi liberta ita husi egoizmu ne'ebé impede rekonsiliaun ho Maromak no ho maun-alin sira.

EVANJELLU – Lc 15,1-3.11-32

Ita kontinua iha "dalan ba Jerusalém", dalan espirituál ne'ebé Jezús halo ho eskolante sira, hodi prepara sira sai sasin Reinu nian iha ema sira hotu nia oin.

Kapítulu 15 tomak dedika ba ensinamentu kona-ba laran-sadia: iha ai-kanoik tolu. Lucas apresenta katekeze ida kona-ba Maromak nia laran-di'ak no domin ne'ebé hakarak lolo liman ba ema hotu ne'ebé teolojia ofisiál esklui no tau dook. Hahú ho farizeu no eskriba sira nia murmurasaun ne'ebé, iha publikanu no sala-nain lubun boot be rona Jezús, sira murmura: "ema ne'e simu sala-nain sira no han ho sira". Simu publikanu no sala-nain mak buat ruma

eskandalozu, iha farizeu sira nia perspetiva; seidauk susede katak, ema di'ak sira han ho sira, kria lasu familairidade no irmandade ho sira hadulas meza... Farizeu sira-nia konkluzau la seluk: Jezús la bele mai husi Maromak tanba, iha doutrina tradisionál nia perspetiva, sala-nain sira la bele hakbesik Maromak.

Iha kontestu ida-ne'e mak Jezús apresenta "ai-kanoik Oan ne'ebé soe hela uma". Ai-kanoik ida Lucas nian mesak.

MENSAJEN

Ai-kanoik apresenta personajen na'in tolu: aman, oan mane ki'ik no oan mane boot. Ita ba haree uitoan figura sira ne'e.

Peronajen sentrá mak aman. Nia mak figura exesionál, ne'ebé tau hamutuk respeitu ba oan sira nia liberdade no desizaun, ho domin gratuitu lahó limite. Domin ida-ne'e hatudu iha emosaun ne'ebé nia iha bainhira hakohak nia oan mane ne'ebé fila, maski la hatene se oan ne'e muda ninia atitude foti-an no autosufisiénsia nian hasoru nia aman no nia uma. Aman nia domin mak domin ida ne'ebé la muda, maski oan sai rebelde; aman ida ne'ebé kontinua hadomi, apezarde oan nia auzénsia no infidelidade. Aman nia domin nia konsekuénsia simboliza liuhusi "kadeli", símbolu autoridade nian (kf. Gn 41,42; Est 3,10; 8,2) no iha sandália sira ema livre nian.

Hafoin, mai oan mane ki'ik. Nia mak oan ingratu ida, laiha respeitu no ulun toos, ne'ebé ezije husi nia aman liu fali buat ne'ebé ninia direitu (lei judaika dehan katak oan ki'ik simu de'it 1/3 husi nia aman nia soin – kf. Dt 21,15-17; maibé, maski divizaun propriedade sira nian bele halo durante aman nia moris, oan sira la iha asesu atu foti soin sira se aman seidauk mate – kf. Sir 33,20-24). Aleinde ne'e, nia husik uma no aman nia domin no hamohu soin sira ne'ebé nia aman tau iha nia liman. Ne'e mak ilas ida egoíзму nian, foti-an nian, autosufisiénsia nian, frivolidade nian (levianu), irresponsabilidade totál nian. Ikusnian nia komprende moris mamuk ne'ebé nia hala'o no lahó sentidu, dezesperu moris egoíзму no autosufisiénsia nian nune'e, hola korajen atu ba hasoru nia aman nia domin.

Finalmente, ita iha oan mane boot. Nia mak oan "la sala", ne'ebé halo nafatin buat ne'ebé nia aman haruka, ne'ebé kumpre regra sira no nunca hanoin atu husik espasu kómodu no maksimuk, katak aman ninia uma. Maski nune'e, ninia lójika mak lójika "justisa" nian no la'ós lójika "laran-sadia" nian. Nia hanoin katak nia iha kréditu aas liu fali nia alin no la komprende no la aseita atu nia aman ezerse ninia direitu laran-sadia nian no simu fali ho ksolok, oan mane rebelde. Ida-ne'e mak ilas farizeu no eskriba sira-nian ne'ebé interpela Jezús: tanba sira kumpre ezijénsia hotu Lei nian, sira despreza ema sala-nain sira no hanoin katak ida-ne'e mós mak tenkeser Maromak nia lójika.

"Ai-kanoik aman laran-di'ak no laran-sadia nian" hakarak apresenta mai ita Maromak nia lójika. Maromak mak Aman laran-di'ak, ne'ebé respeita ho modu absolutu oan sira nia liberdade no desizaun sira, maski sira uza liberdade ne'e atu buka ksolok ho dalan laloos. No, sá de'it mak akontese karik bá, nia kontinua hadomi no hein ho ánsia atu oan rebelde ne'e fila fali. Bainhira hasoru fali, nia simu ho domin no integra fali nia iha ninia família. Ne'e mak Maromak nia ksolok. Iha Maromak domin nian ida-ne'e, laran-di'ak nian, laran-sadia nian, ne'ebé haksolok ho oan ne'ebé fila fali, mak ita iha serteza atu hasoru bainhira ita fila fali.

Ai-kanoik hakarak sai mós konvite ida atu husik dinámika domin nian ida-ne'e lori ka gia ita iha julgamentu hasoru ita-nia maun-alin sira. Liufali "justisa", mai ita husik atu laran-sadia mak gia ita, hanesan Maromak nia hahalok rasik.